

Odluka kojom se donosi Zakon o izmjenama i dopunama Zakona o izdvajanju i usmjeravanju dijela prihoda preduzeća ostvarenog korištenjem hidroakumulacionih objekata

Koristeći se ovlaštenjima koja su Visokom predstavniku data u članu V Aneksa 10. (Sporazum o implementaciji civilnog dijela mirovnog ugovora) Općeg okvirnog sporazuma za mir u Bosni i Hercegovini, prema kojem je Visoki predstavnik konačni autoritet u zemlji u pogledu tumačenja gore navedenog Sporazuma o implementaciji civilnog dijela mirovnog ugovora; i posebno uzevši u obzir član II 1. (d) istog Sporazuma prema kojem Visoki predstavnik "pomaže, kada ocijeni da je to neophodno, u rješavanju svih problema koji se pojave u vezi sa implementacijom civilnog dijela mirovnog ugovora";

Pozivajući se na stav XI.2 Zaključaka Konferencije za implementaciju mira održane u Bonu 9. i 10. decembra 1997. godine, u kojem je Vijeće za implementaciju mira pozdravilo namjeru Visokog predstavnika da iskoristi svoj konačni autoritet u zemlji u vezi sa tumačenjem Sporazuma o implementaciji civilnog dijela mirovnog ugovora, kako bi pomogao u iznalaženju rješenja za probleme u skladu sa gore navedenim "donošenjem obavezujućih odluka, kada ocijeni da je to neophodno", o određenim pitanjima, uključujući i (prema tački (c) stava XI.2) "mjere kojima se obezbjeđuje implementacija mirovnog sporazuma na cijeloj teritoriji Bosne i Hercegovine i njenih entiteta";

Podsjećajući takođe da je 2. avgusta 2000. godine Gradsko vijeće Mostara donijelo Odluku o naknadi za upravljanje područjima za osiguranje infrastrukture na osnovu Amandmana XVI na Ustav Federacije Bosne i Hercegovine, Amandmana I na Ustav Hercegovačko-neretvanskog kantona, člana 64. Zakona o lokalnoj samoupravi Hercegovačko-neretvanskog kantona, člana 5. Zakona o dodjeli javnih prihoda Hercegovačko-neretvanskog kantona, člana 7. stav 2. i člana 64. Prijelaznog statuta Grada Mostara;

Konstatirajući da se naknadama utvrđenim navedenom odlukom osiguralo približno 50% budžetskih prihoda za finansiranje Uprave Grada Mostara;

Konstatirajući takođe da je jedna od posljedica kasnije usvojenog Zakona o izdvajanju i usmjeravanju dijela prihoda preduzeća ostvarenog korištenjem hidroakumulacionih objekata ("Službene novine Federacije Bosne i Hercegovine", br. 44/02) preusmjeravanje prihoda predviđenih u Odluci iz prethodnog stava u budžet općina, a ne u budžet Uprave Grada Mostara;

Konstatirajući isto tako da je time izazvana finansijska kriza u Upravi Grada Mostara i bez ovih naknada od utvrđenih preduzeća Upravi Grada Mostara, Uprava će doživjeti finansijski krah i neće biti u mogućnosti da pruža javne usluge u Gradu Mostaru;

Pozivajući se na stav 3. Dodatka o Federaciji BiH uz Zaključke sa Konferencije za implementaciju mira održane u Bonu 9. i 10. decembra 1997. god. u kojem Vijeće zahtijeva da "Federacija što prije (...) osigura da Grad Mostar i njegova jedinstvena Gradska uprava budu funkcionalne u svakom pogledu".

Imajući na umu da su već preduzeti koraci na osnivanju komisije zadužene za izradu sveobuhvatnog prijedloga administrativne budućnosti Grada, uključujući i njegovo finansiranje;

Vodeći računa da je ujedinjeni Grad Mostar sa funkcionalnom Gradskom upravom neophodan za stvaranje demokratskih i multietničkih političkih procesa na lokalnom nivou;

Imajući sve ovo u vidu i uzevši sve u obzir, Visoki predstavnik donosi slijedeću:

ODLUKU

kojom se donosi Zakon o izmjenama i dopunama Zakona o izdvajanju i usmjeravanju dijela prihoda preduzeća ostvarenog korištenjem hidroakumulacionih objekata

("Službene novine Federacije BiH", br. 44/02)

Ovaj zakon stupa na snagu kao zakon Federacije Bosne i Hercegovine i na snazi je od dana utvrđenog u članu 2. zakona, na privremenoj osnovi, dok ga Parlament Federacije Bosne i Hercegovine ne usvoji u istom obliku, bez izmjena i dopuna i postavljanja uslova.

Ova odluka stupa na snagu odmah i odmah se objavljuje u "Službenim novinama Federacije Bosne i Hercegovine".

Sarajevo, 17. april 2003.

*Paddy Ashdown
Visoki predstavnik*

Zakon o izmjenama i dopunama Zakona o izdvajanju i usmjeravanju dijela prihoda preduzeća ostvarenog korištenjem hidroakumulacionih objekata Federacije Bosne i Hercegovine

Član 1.

U Zakonu o izdvajanju i usmjeravanju dijela prihoda preduzeća ostvarenog korištenjem hidroakumulacijskih objekata ("Službene novine Federacije BiH", br. 44/02), član 10. se dopunjuje tako što se na kraju člana dodaje novi stav koji glasi:

"Izuzetno od prethodnog stava ovog člana, Odluka o naknadi za upravljanje područjima za osiguranje infrastrukture ("Službene novine Grada Mostara", br. 1/2000), izmijenjena i dopunjena Odlukom Visokog predstavnika datuma utvrđenog u tekstu te odluke primjenjivat će se u izmijenjenom i dopunjenom obliku do momenta kada se izvrši odgovarajuća organizacija za jedinstvenu administrativnu strukturu za Grad u cjelini, uključujući i njegovo finansiranje, ali najkasnije do 30. aprila 2004. godine na kategoriju obveznika plaćanja definiranu u članu 2. stav 1. navedene Odluke koja obuhvata preduzeća za proizvodnju, prenos i distribuciju električne energije koja koriste hidroakumulacijske objekte na području Grada Mostara.

Od 1. maja 2004. godine izmjene i dopune Odluke u pogledu navedene kategorije obveznika plaćanja naknade prestaju da važe."

Član 2.

Ovaj zakon stupa odmah na snagu i odmah se objavljuje u "Službenim novinama Federacije Bosne i Hercegovine".